

Laga partidonan politico bringa cu otro pasobra:

Insulto y humiyacion contra famia di Betico a bay demasiado leu

ORANJESTAD (AAN): Diferencia di opinion politico ta e libertad cu cada ciudadano na Aruba tin y e libertad aki mientras cu Aruba ta un pais democratico cu un Constitucion solido, ningun hende por mishi cune.

Libertad di expresion ta un derecho y un balor sagrado, pero e mesun libertad y balor grandi aki no ta duna ningun hende e derecho di kere di por bay insulta y humiya un famia directamente den e sentido amplio di e palabra manera cu nan ta haya ta bon.

Cada ken ta considera asuntonan familiar como algo priva y famia ta algo cu ningun hende cu no ta forma parti di e famia por mishi cune.

Esaki no ta e caso cu e famia di Libertador Betico Croes, kende su number, su ehempel-

nan, su actonan, su lucha cu el a hiba pa pais Aruba y su pueblo y te hasta identidad di su yiunan, diripiente a bira propiedad comun di militancia politico di diferente partido na Aruba.

Betico su casa y yiunan a worde lastra ultimamente na un forma mahos y hopi baho na diferente radio emisora.

E forma con esaki a worde haci y tambe e espacio cu diferente hende cu tabata yama anonimo scondiendo tras di nan telefoon na cas o donde sea, a haya pa haci y deshaci cu famia di Betico, tabata muestra di un falta di respet grandi cu a para caba den un berguensa nacional.

Cu tin hende y politiconan na Aruba cu no ta di acuerdo cu e 4 yiunan di Betico cu awe sea directo o indirecto tin di haber cu e gobierno actual, esaki ta cay bao di e libertad di pensamiento cu tur hende na Aruba tin, pero esaki no ta duna ningun hende un carta abierto pa lastra e famia aki manera cu a tuma lugar ultimo dianan.

Na radio tabata tin hende cu tabata puntra (sin menciona number) si den venanan di

yiunan di Betico tin sanger di Betico ta core?!

Si esaki no ta un insulto y un humiyacion grandi, anto ta con e mester worde yama?

Esnan cu tabata yama den scondi y cuestiona si den venanan di yiunan di Betico su sanger ta core si o no, lo gusta si un o mas hende yama y haci e mesun tipo di remarkanen humiyante asina contra nan mesun famia o contra famia di nan lidernan politico?

Unda Rudy Croes kende ta ruman di Betico a keda pa para tipo di humiyacion asina na radio y sali na defensa di algo netamente familiar di Betico Croes?

Bo por ta contrincante politico di bo sobrino, pero ora cu ta trata di asuntonan familiar y militancia di bo mesun partido cu ta cuestiona e sanger cu ta core den venanan di bo mesun famia, anto esey si ta bay demasiado leu y esey ta un falta di respet cu abo como politico hamas y nunca por acepta den bo mesun partido pasobra e humiyacion ta ser tira directamente pa abo mes.

Betico Croes ta e unico cu a logra Status Aparte pa Aruba y

si pa motibonan politico awe su yiunan ta para na cualkier banda di cualkier baricada politico cu por tin na Aruba, esaki no kiermen cu e yiunan por worde sacrifica politicamente na antoho di cada ken cu ta milita pa cualkier partido politico.

Na momento cu yiunan y casa di Betico pidi pueblo pa respetan nan famia y nan tata, pueblo mester respeta e peticion di e famia pasobra ta nan ta esnan directamente famia di Betico y ningun otro hende mas!!!

Politica no por pone cu cada ken ta haci doño di Betico na e forma cu e ta haya ta bon y te hasta bay asina leu pa cuestiona sanger cu ta core den e famia di Betico!

Tur esnan cu ta permiti pa un famia worde humiya dje forma manera cu a tuma lugar ultimo dianan contra famia di Betico, ta haci nan mes culpabel na un acto hopi baho y cu mester worde cuestiona nacionalmente.

Ta con Nel, Henny, Benny, Charo y otro miembronan di partido MEP, ADN, PPA y AVP lo sinti nan mes si na radio via un forma anonimo, e

sanger cu ta core den venanan di nan famia worde cuestiona pa motibonan y metanan politico?

Laga politiconan bataya cu otro riba asuntonan cu tin di haber cu politica y no cu famianan ta ser lastra dia aden dia afor na radio y asina humiyacion poco poco ta ser presenta na pueblo y sigur na muchanan chiquito, manera cu esaki a bira algo comun y coriente na Aruba.

Cualquier partido politico cu no cuestiona lastramento y humiyacion personal di un famia na Aruba, manera cu a pasa recientemente cu e famia di Betico Croes, no merece di haya ningun sorto di apoyo den pueblo pasobra nan mes ta sigui habri caminda y fomenta e pasonan maligno pa tipo di actonan baho asina cu hamas por haya sosten den pueblo.

Awe ta dia di fayecimento di Betico Croes y tur hende mester respeta e famia di Betico Croes cu awe ta recorda fayecimento di nan tata y familiar y no tin espacio mas pa cuestionamento personal di e famia di Betico, awor ta basta; respeta famia di hende!!

RECLAMO RIBA

E LISTA DI

"COORDINADORAN"

ORANJESTAD (AAN): Un di e werksternan di cual su number a aparece den e 'lista' cu Partido AVP a divulga, relaciona cu e salario di Coordinadornan di 2 Ministro durante Gobernacion di MEP, a keda sumamente sorprendi.

Den oranan di merdia, e werkster a ripara cu su number a aparece, y cu e lo mester a gana un 'suma basta grandi' trahando pa MEP.

Esaki ta algo cu e werkster Sra. Luidens ta describi como nonsense. E tin tur su payslip di 1994 ainda, y por mira claramente cu su entrada tabata 780 Florin pa luna, y finalmente despues di e deduccinnan e ta bay cas cu 741 Florin.

Te aworaki numa e ta hayando e minimumloon como salario, y sigur no ta di acuerdo cu e lista cu a aparece den prensa.

Si acaso e mester a gana un suma asina grandi, su pregunta ta: Unda e placa a keda anto?

Pues pa señora Luidens, e lista cu AVP a publica no ta corecto.

